

通志堂集

通志堂集卷六

納蘭

性德

容若

原名成德

詞一

夢江南

江南好建業舊長安紫蓋忽臨雙鷁渡翠華爭擁  
六龍看雄麗却高寒

又

江南好城闕尚嵯峨故物陵前惟石馬遺踪陌上  
有銅駝玉樹夜深歌

又

江南好懷古意誰傳燕子磯頭紅蓼月烏衣巷口  
綠楊烟風景憶當年

又

江南好虎阜晚秋天山水總歸詩格秀笙簫恰稱  
語音圓誰在木蘭船

又

江南好真個到梁溪一幅雲林高士画數行泉石  
故人題還似夢遊非

又

江南好水是二泉清味永出山那得濁名高有錫  
更誰爭何必讓中冷

又

江南好佳麗數維揚自是瓊花偏得月那應金粉  
不兼香誰與話清涼

又

江南好鐵甕古南徐立馬江山千里目射蛟風雨  
百靈趨北顧更躊躇

又

江南好一片妙高雲  
覘北峰巒米外史屏間樓閣  
李將軍金碧轟斜曛

又

江南好何處異京華  
香散翠簾多在水綠殘紅葉  
勝于花無事避風沙

又

昏鴉盡小立恨因誰  
急雪乍翻香閣絮輕風吹到  
膽瓶梅心字已成灰

又

新來好唱得虎頭詞一片冷香惟有夢十分清瘦  
更無詩標格早梅知

江城子

詠史

濕雲金壓數峰低影淒迷望中疑非霧非烟神女  
欲來時若問生涯原是夢除夢裏没人知

如夢令

正是轆轤金井滿砌落花紅冷驀地一相逢心事  
眼波難定誰省誰省從此簾紋燈影

又

黃葉青苔歸路  
麝粉衣香何處  
消息竟沈沈  
今夜相思幾許  
秋雨秋雨一半因風吹去

又

纖月黃昏  
庭院語密翻教醉淺  
知否那人心舊恨  
新歡相半  
誰見誰見  
珊枕淚痕紅  
泣

采桑子

彤霞久絕飛瓊字  
人在誰邊  
人在誰邊  
今夜玉清  
眠不眠  
香消被冷  
殘燈滅靜  
數秋天  
靜數秋天

又誤心期到下弦

又

誰翻樂府淒涼曲風也蕭蕭雨也蕭蕭瘦盡燈花  
又一宵不知何事縈懷抱醒也無聊醉也無聊  
夢也何曾到謝橋

又

嚴霜擁絮頻驚起撲面霜空斜漢朦朧冷逼氈帷  
火不紅香篝翠被渾閒事回首西風何處踈鐘  
一穗燈花似夢中



又

那能寂寞芳菲節  
欲話生平夜已三更  
一闋悲歌  
淚暗零  
須知秋葉春花促  
點鬢星星  
遇酒須傾  
莫問千秋萬歲名

又

冷香縈遍紅橋夢  
夢覺城笳月上  
桃花雨歇春寒  
燕子家  
瑩篴別後誰能鼓腸斷  
天涯暗損韶華  
一縷茶烟透碧紗

又

九日

深秋絕塞誰相憶，木葉蕭蕭鄉路迢迢。六曲屏山  
和夢遙。佳時倍惜風光，別不爲登高。祇覺魂銷  
南雁歸時，更寂寥。

又

詠春  
雨

嫩烟分染鵝兒柳，一樣風絲似整。如翫纔著春寒  
瘦不支。涼侵曉夢輕蟬膩，約畧紅肥。不惜葳蕤  
碾取名香，作地衣。

又

塞上咏  
雪花

非關癖愛輕模樣，冷處偏佳。別有根芽，不是人間

富貴花 謝娘別後誰能惜飄泊天涯寒月悲笳  
萬里西風瀚海沙

又

桃花羞作無情死感激東風吹落嬌紅飛入閒窻  
伴懊儂 誰憐辛苦東陽瘦也爲春慵不及芙蓉  
一片幽情冷處濃

又

海天誰放冰輪滿惆悵離情莫說離情但值涼宵  
總淚零 祇應碧落重相見那是今生可奈今生

剛作愁時又憶卿

又

明月多情應笑我  
我笑我如今辜負春心  
獨自閒行  
獨自吟  
近來怕說當時事  
結徧蘭襟  
月淺燈深  
夢裏雲歸何處尋

又

撥燈書盡紅箋也  
依舊無聊玉漏迢迢  
夢裏寒花  
隔玉簫  
幾竿脩竹  
三更雨  
葉葉蕭蕭  
分付秋潮  
莫誤雙魚到謝橋

五十六

又

涼生露氣湘絃潤  
暗滴花梢簾影誰搖  
燕蹴風絲上柳條  
舞鷗鏡匣開頻掩  
檀粉慵調朝淚如潮  
昨夜香衾覺夢遙

又

土花曾染湘娥黛  
鉛淚難消清韻誰敲  
不是犀椎是鳳翹  
祇應長伴端溪紫  
割取秋潮鸚鵡偷教  
方響前頭見玉簫

又

白衣裳凭朱闌立涼月趁西點鬢霜微歲晏知君  
歸不歸 殘更目斷傳書雁尺素還稀一味相思  
準擬相看似舊時

又

謝家庭院殘更立燕宿雕梁月度銀牆不辨花叢  
那辨香 此情已自成追憶零落鴛鴦雨歇微涼  
十一年前夢一場

又

而今纔道當時錯心緒淒迷紅淚偷垂滿眼春風

百事非 情知此後來無計強說歡期一別如斯  
落盡梨花月又西

臺城路

洗妝臺  
懷古

六宮佳麗誰曾見層臺尚臨芳渚露脚斜飛虹腰  
欲斷荷葉未收殘雨添妝何處試問取雕籠雪衣  
分付一鏡空濛鴛鴦拂破白蘋去 相傳內家結  
束有帕裝孤穩鞦韆縫女古冷艷全消蒼苔玉匣翻  
出十眉遺譜人間朝暮看臉粉亭西幾堆塵土只  
有花鈴縮風深夜語

又  
上元

闌珊火樹魚龍舞望中寶釵樓遠韎韞餘紅琉璃  
賸碧待囑花歸緩緩寒輕漏淺正乍斂烟霏隕星  
如箭舊事驚心一雙蓮影藕絲斷莫恨流年逝  
水恨銷殘蝶粉韶光忒賤細語吹香暗塵籠髻都  
逐曉風零亂闌干敲遍問簾底纖纖甚時重見不  
解相思月華今夜滿

又  
塞外  
七夕

白狼河北秋偏早星橋又迎河鼓清漏頻移微雲



欲濕正是金風玉露兩眉愁聚待歸踏榆花那時  
纔訴只恐重逢明明相視更無語 人問別離無  
數向瓜果筵前碧天凝竚連理千花相思一葉畢  
竟隨風何處羈栖良苦算未抵空房冷香啼曙今  
夜天孫笑人愁似許

玉連環影

何處幾葉蕭蕭雨濕盡簷花花底人無語掩屏山  
玉爐寒誰見兩眉愁聚倚闌干

洛陽春

雪

密灑征鞍無數冥迷遠樹亂山重疊香難分似五  
里濛濛霧 惆悵瑣窓深處濕花輕絮當時悠颺  
得人憐也都是濃香助

謁金門

風絲裊水浸碧天清曉一鏡濕雲青未了雨晴春  
草草 夢裏輕螺誰掃簾外落花紅小獨睡起來  
情悄悄寄愁何處好

四和香

麥浪翻晴風颭柳已過傷春候因甚爲他成僝僽

畢竟是春迤逗 紅藥闌邊携素手暖語濃于酒  
盼到花鋪似繡却更比春前瘦

海棠月 瓶梅

重簷淡月渾如水浸寒香一片小牕裏雙魚凍合  
似曾伴箇人無寐橫眸處索笑而今已矣 與誰  
更擁燈前髻乍橫斜影疑飛墜銅瓶小注休教  
近麝爐烟氣酬伊也幾點夜深清淚

金菊對芙蓉 上元

金鴨消香銀虬瀉水誰家夜笛飛聲正上林雪霽

鴛鴦晶瑩魚龍舞罷香車杳  
騰尊前袖掩吳綾狂  
遊似夢而今空記密約燒燈  
追念往事難憑嘆  
火樹星橋回首飄零但九達烟月依舊籠明楚天  
一帶驚烽火問今宵可照江城小  
牕殘酒闌珊燈  
炮別自關情

點絳脣

一種蛾眉下弦不似初弦好  
庾郎未老何事傷心  
早素壁斜輝竹影橫  
牕掃空房悄烏啼欲曉又  
下西樓了

又  
詠風  
蘭

別樣幽芬更無濃艷  
催開處凌波欲去且爲東風  
住  
忒煞蕭疎爭奈秋如許  
還留取冷香半縷  
第一湘江雨

又  
寄南海  
梁藥亭

一帽征塵留君不住  
從君去片帆何處  
南浦沈香  
雨  
回首風流紫竹村邊  
住孤鴻語三生定許可  
是梁鴻侶

又  
黃花城  
早望

五夜光寒照來積雪平于棧西風何限自起披衣  
看對此茫茫不覺成長嘆何時旦曉星欲散飛  
起平沙雁

又

小院新涼晚來頓覺羅衫薄不成孤酌形影空酬  
酢蕭寺憐君別緒應蕭索西風惡夕陽吹角一  
陣槐花落

浣溪沙

消息誰傳到拒霜兩行斜鴈碧天長晚秋風景倍

淒涼 銀蒜押簾人寂寂 玉釵敲竹信茫茫 黃花  
開也近重陽

又

雨歇梧桐淚乍收 遣懷翻自憶 從頭摘花銷恨舊  
風流 簾影碧桃人已去 屨痕蒼蘚徑空留 兩眉  
何處月如鉤

又

欲問江梅瘦幾分 祇看愁損翠羅裙 麝篝衾冷惜  
餘熏 可耐暮寒長倚竹 便教春好不關門 枇杷

花底較書人

又

淚浥紅牋第幾行  
喚人嬌鳥怕開牕  
那能聞過好  
時光  
屏障厭看金碧  
畫羅衣不奈水沈香  
遍翻  
眉譜只尋常

又

殘雪凝輝冷  
畫屏落梅橫  
笛已三更  
更無人處月  
朧明  
我是人間惆悵客  
知君何事淚縱橫  
斷腸  
聲裏憶平生



睡起惺惚強自支綵傾蟬鬢下簾時夜來愁損小  
腰肢 達信不歸空竚望幽期細數却參差更兼  
何事耐尋思

又

十里湖光載酒遊青簾低映白蘋洲西風聽徹採  
菱謳 沙岸有時雙袖擁画船何處一竿收歸來  
無語晚妝樓

又

脂粉塘空遍綠苔掠泥營壘燕相催妬他飛去却

飛回 一騎近從梅里過  
片帆遙自藕溪來  
博山香燼未全灰

又

五月江南麥已稀  
黃梅時節雨霏微  
閒看燕子教雛飛  
一水濃陰如罨畫  
數峰無恙又晴暉  
濺裙誰獨上漁磯

又

誰道飄零不可憐  
舊遊時節好花天  
斷腸人去自今年  
一片暈紅繞著雨  
幾絲柔綠乍和烟  
倩魂

銷盡夕陽前

又

詠五更和  
湘真韻

微暈嬌花濕欲流  
簾紋燈影一生愁  
夢回疑在遠山樓  
殘月暗窺金屈戍  
軟風徐蕩玉簾鉤  
待聽鄰女喚梳頭

又

伏雨朝寒愁不勝  
那能還傍杏花行  
去年高摘鬪輕盈  
漫惹爐烟雙袖紫  
空將酒暈一衫青  
人間何處問多情

又

五字詩中自乍成儘教殘福折書生手按裙帶那  
時情 別後心期和夢杳年來憔悴與愁并夕陽  
依舊小牕明

又

欲寄愁心朔雁邊西風濁酒慘離顏黃花時節碧  
雲天 古戍烽烟迷斥堠夕陽村落解鞍韉不知  
征戰幾人還

又

記綰長條欲別難盈盈自此隔銀灣便無風雪也  
摧殘 青雀幾時裁錦字玉蟲連夜翦春幡不禁  
辛苦況相關

又

誰念西風獨自涼蕭蕭黃葉閉疎窓沈思往事立  
殘陽 被酒莫驚春睡重賭書消得潑茶香當時  
祇道是尋常

又

十八年來墮世間吹花嚼蕊弄冰絃多情情寄阿

誰邊 紫玉釵斜燈影背紅絲粉冷枕函偏相看  
好處却無言

又

蓮漏三聲燭半條杏花微雨濕紅綃那將紅豆記  
無聊 春色已看濃似酒歸期安得信如潮離魂  
入夜倩誰招

又

身向雲山那畔行北風吹斷馬嘶聲深秋遠塞若  
爲情 一抹晚烟荒戍壘半竿斜日舊關城古今

幽恨幾時平

又大覺寺

燕壘空梁，畫壁寒。諸天花雨散，幽關篆香。清楚有無間。蛺蝶乍從簾影度，櫻桃半是鳥銜殘。此時相對一忘言。

又

古北口

楊柳千條送馬蹄，北來征雁舊南飛。客中誰與換春衣。終古閒情歸落照，一春幽夢逐遊絲。信回剛道別多時。

又

鳳髻拋殘秋草生  
高梧濕月冷無聲  
當時七夕記深盟  
信得羽衣傳鈿合  
悔教羅襪葬傾城  
人間空唱雨淋鈴

又

敗葉填溪水已冰  
夕陽猶照短長亭  
何年廢寺失題名  
倚馬客臨碑上字  
鬪雞人撥佛前燈  
淨消塵土禮金經

又

庚申  
除夜



收取閒心冷處濃舞裙猶憶柘枝紅誰家刻燭待  
春風 竹葉樽空翻綵燕九枝燈施顫金蟲風流  
端合倚天公

又

萬里陰山萬里沙誰將綠鬢鬪霜華年來強半在  
天涯 魂夢不離金屈戍畫圖親展玉鴉叉生憐  
瘦減一分花

又

腸斷班駝去未還繡屏深鎖鳳簫寒一春幽夢有

無聞 逗雨踈花濃淡改關心芳字淺深難不成  
風月轉摧殘

又

容易濃香近画屏繁枝影著半窓橫風波狹路倍  
憐卿 未接語言猶悵望纔通商畧已曹騰只嫌  
今夜月偏明

又

拋却無端恨轉長慈雲稽首返生香妙蓮花說試  
推詳 但是有情皆滿願更從何處著思量篆烟

殘燭並回腸

又小元

喇

樺屋魚衣柳作城  
蛟龍鱗動浪花腥  
飛揚應逐海東青  
猶記當年軍壘跡  
不知處梵鐘聲  
莫將興廢話分明

又姜女

祠

海色殘陽影斷霓  
寒濤日夜女郎祠  
翠鈿塵網上蛛絲  
澄海樓高空極目  
望夫石在且留題  
六王如夢祖龍非

又

旋拂輕容寫洛神須知淺笑是深顰十分天與可  
憐春 掩抑薄寒施軟障抱持纖影藉芳茵未能  
無意下香塵

又

十二紅簾窈地深纔移剗襪又沈吟晚晴天氣惜  
輕陰 珠被佩囊三合字寶釵攏髻兩分心定緣  
何事濕蘭襟

又

紅橋懷古和  
王阮亭韻

無恙年年汴水流一聲水調短亭秋  
舊時明月照揚州  
曾是長隄牽錦纜綠楊清瘦  
至今愁玉鈞斜路近  
逃樓

風流子

秋郊  
即事

平原草枯矣重陽後黃葉樹騷騷  
記玉勒青絲落花時節曾逢拾翠  
忽聽吹簫今來是燒痕殘碧盡  
霜影亂紅凋秋水映空寒烟如織  
皂雕飛處天慘雲高  
人生須行樂君知否容易兩鬢蕭蕭  
自與東君作別剗地無聊  
算功名何許此身博得短衣

射虎沽酒西郊便向夕陽影裏倚馬揮毫

畫堂春

一生一代一雙人爭教兩處銷魂相思相望不相  
親天爲誰春 槩向藍橋易乞藥成碧海難奔若  
容相訪飲牛津相對忘貧

蝶戀花

辛苦最憐天上月一昔如環昔昔都成玦若似月  
輪終皎潔不辭冰雪爲卿熱 無那塵緣容易絕  
燕子依然軟踏簾鈎說唱罷秋墳愁未歇春叢認

取雙栖蝶

又

眼底風光留不住和暖香又上雕鞍去欲倩烟  
絲遮別路垂楊那是相思樹惆悵玉顏成間阻  
何事東風不作繁華主斷帶依然留乞句斑駁一  
繫無尋處

又

散花樓  
送客

城上清笳城下杵秋盡離人此際心偏苦刀尺又  
催天又暮一聲吹冷蒹葭浦把酒留君君不住

莫被寒雲遮斷君行處行宿黃茅山店路夕陽村  
社迎神鼓

又

準擬春來消寂寞愁雨愁風翻把春擔閣不爲傷  
春情緒惡爲憐鏡裏顏非昨 畢竟春光誰領畧  
九陌緇塵抵死遮雲壑若得尋春終遂約不成長  
負東君諾

又

又到綠楊曾折處不語垂鞭踏遍清秋路衰草連



詞八  
天無意緒鴈聲遠向蕭關去  
不恨天涯行役苦  
只恨西風吹夢成今古  
明日客程還幾許  
露衣況是新寒雨

又

蕭瑟蘭成看老去爲怕多情不作憐花句  
閣淚倚花愁不語  
暗香飄盡知何處  
重到舊時明月路  
袖口香寒心比秋蓮苦  
休說生生花裏住  
惜花人去花無主

又

露下庭柯蟬響歇紗碧如烟烟裏玲瓏月並著香  
肩無可說櫻桃暗解丁香結笑捲輕衫魚子纈  
試撲流螢驚起雙栖蝶瘦斷玉腰沾粉葉人生那  
不相思絕

又

出塞

今古河山無定據画角聲中牧馬頻來去滿目荒  
涼誰可語西風吹老丹楓樹從前幽怨應無數  
鐵馬金戈青塚黃昏路一往情深深幾許深山夕  
照深秋雨

又

盡日驚風吹木葉極目嗟峨一丈天山雪去去丁  
零愁不絕那堪客裏還傷別 若道客愁容易輟  
除是朱顏不共春銷歇一紙鄉書和淚摺紅闥此  
夜團圓月

河傳

春殘紅怨掩雙環微雨花間晝閒無言暗將紅淚  
彈闌珊香銷輕夢還 斜倚画屏思往事皆不是  
空作相思字記當時垂柳絲花枝滿庭胡蝶兒

河瀆神

涼月轉雕闌蕭蕭木葉聲乾銀燈飄落璫窓閒枕  
屏幾疊秋山朔風吹透青縑被藥爐火煖初沸  
清漏沈沈無寐爲伊判得憔悴

又

風緊鴈行高無邊落木蕭蕭楚天魂夢與香消青  
山暮暮朝朝斷續涼雲來一縷飄墮幾絲靈雨  
今夜冷紅浦澈鴛鴦栖向何處

落花時

夕陽誰喚下樓梯一握香黃回頭忍笑堦前立總  
無語也依依箋書直恁無憑據休說相思勸伊  
好向紅牕醉須莫及落花時

通志堂集卷六

通志堂集卷七

納蘭

性德

容若

原名成德

詞二

金縷曲

贈梁汾

德也狂生耳偶然間緇塵京國烏衣門第有酒惟  
澆趙州土誰會成生此意不信道遂成知己青眼  
高歌俱未老向樽前拭盡英雄淚君不見月如水  
共君此夜須沈醉且由他蛾眉謠詠古今同忌  
身世悠悠何足問冷笑置之而已尋思起從頭翻

悔一日心期千劫在後身緣恐結他生裏然諾重  
君須記

又

姜西溟言別  
賦此贈之

誰復留君住嘆人生幾番離合便成遲暮最憶西  
牕同翦燭却話家山夜雨不道只暫時相聚袞袞  
長江蕭蕭木送遙天白鴈哀鳴去黃葉下秋如許  
曰歸因甚添愁緒料強似冷烟寒月棲遲梵宇  
一事傷心君落魄兩鬢飄蕭未遇有解憶長安兒  
女裘敝入門空太息信古來才命真相負身世恨

共誰語

又簡梁  
汾

灑盡無端淚，莫因他瓊樓寂寞，候來人世。信道癡兒多厚福，誰遣偏生明慧。莫更著浮名相累。仕宦何妨如斷梗，只那將聲影供羣吠。天欲問，且休矣。

情深我自判憔悴，轉丁寧香，憐易熱。玉憐輕碎。羨殺輓紅塵裏客。一味醉生夢死，歌與哭，任猜何意。絕塞生還，吳季子，算眼前此外，皆閒事。知我者，梁汾耳。



又寄梁汾

木落吳江矣正蕭條西風南鴈碧雲千里落魄江  
湖還載酒一種悲涼滋味重回首莫彈酸淚不是  
天公教棄置是南華悞却方城尉飄泊處誰相慰  
別來我亦傷孤寄更那堪冰霜摧折壯懷都廢  
天遠難窮勞望眼欲上高樓還已君莫恨埋愁無  
地秋雨秋花關塞冷且殷勤好作加餐計人豈得  
長無謂

又再贈梁汾用  
秋水軒舊韻

酒澆青衫卷儘從前風流京兆閒情未遣江左知  
名今廿載枯樹淚痕休泣搖落盡玉蛾金繭多少  
殷勤紅葉句御溝深不似天河淺空省識画图展  
高才自古難通顯枉教他堵牆落筆凌雲書扁  
入洛游梁重到處駭看村莊吠犬獨憔悴斯人不  
免袞袞門前題鳳客竟居然潤色朝家典憑觸忌  
舌難翦

又

生怕芳樽滿到更深迷離醉影殘燈相伴依舊回

廊新月在 不定竹聲撩亂 問愁與春宵長短 人比  
踈花還寂寞 任紅蕤落盡 應難管 向夢裏聞低喚  
此情擬倩東風浣 奈吹來餘香病酒 旋添一半  
惜別江郎 渾易瘦 更著輕寒輕暖 憶絮語縱橫 茗  
攏滴滴 西牕紅蠟淚 那時腸早爲而今 斷任枕角  
歌孤館

又

慰西  
溟

何事添悽咽 但由他天公簸弄 莫教磨涅 失意每  
多如意少 終古幾人稱屈 須知道福因才折 獨卧

藜牀看北斗背高城玉笛吹成血聽譙鼓二更徹  
丈夫未肯因人熱且乘閒五湖料理扁舟一葉  
淚似秋霖揮不盡洒向野田黃蝶須不羨承明班  
列馬跡車塵忙未了任西風吹冷長安月又蕭寺  
花如雪

又

三婦忌  
日有感

此恨何時已滴空堦寒更雨歇葬花天氣三載悠  
悠魂夢杳是夢久應醒矣料也覺人間無味不及  
夜臺塵土隔冷清清一片埋愁地釵鈿約竟拋棄

重泉若有雙魚寄，好知他年來苦樂與誰相倚。  
我自終宵成轉側，忍聽湘絃重理。待結箇他生知  
己，還怕兩人俱薄命。再緣慳，剩月零風裏，清淚盡  
紙灰起。

又

踈影臨書卷，帶霜華，高高下下。粉脂都遣，別是幽  
情，嫌嫵媚。紅燭啼痕，休泫趁皓月光浮。冰蘂恰與  
花神供寫，照任潑來淡墨，無深淺。持素障，夜中展  
殘缸，掩過看逾顯。相對處，芙蓉玉綻，鶴翎銀扁。

但得白衣時慰藉一任浮雲蒼犬塵土隔軟紅偷  
免簾幙西風人不寐恁清光肯惜驕裘典休便把  
落英翦

踏莎美人

清明

拾翠歸遲踏青期近香笺小疊鄰姬評櫻桃花謝  
已清明何事綠鬟斜鞦寶釵橫淺黛雙彎柔腸  
幾寸不堪更惹其他恨曉牕窺夢有流鶯也覺箇  
儂憔悴可憐生

紅窓月

燕歸花謝早因循又過清明是一般風景兩樣心  
情猶記碧桃影裏誓三生烏絲闌紙嬌紅篆歷  
歷春星道休孤密約鑒取深盟語罷一絲香露濕  
銀屏

南歌子

翠袖凝寒薄簾衣入夜空病容扶起月明中惹得  
一絲殘篆舊薰籠暗覺歡期過遙知別恨同踈  
花已是不禁風那更夜深清露濕愁紅

又

暖護櫻桃蕊寒翻蛺蝶翎東風吹綠漸冥冥不信  
一生憔悴伴啼鶯素影飄殘月香絲拂綺櫺百  
花迢遞玉釵聲索向綠窓尋夢寄餘生

又

古戍

古戍饑烏集荒城野雉飛何年劫火剩殘灰試看  
英雄碧血滿龍堆玉帳空分壘金笳已罷吹東  
風回首盡成非不道興亡命也豈人爲

一絡索

過盡遙山如画短衣匹馬蕭蕭落木不勝秋莫回



首斜陽下 別是柔腸縈挂待歸纔罷却愁擁髻  
向燈前說不盡離人話

又

野火拂雲微綠西風夜哭蒼茫雁翅列秋空憶寫  
向屏山曲 山海幾經翻覆女牆斜矗看來費盡  
祖龍心畢竟爲誰家築

赤棗子

驚曉漏護春眠格外嬌慵祇自憐寄語釀花風日  
好綠窓來與上琴絃

眼兒媚

林下閨房世罕儔，偕隱足風流。今來忍見鶴孤華，表人遠羅浮。中年定不禁哀樂，其奈憶曾遊。浣花微雨採菱斜，日欲去還留。

又

詠紅姑娘

騷屑西風弄晚寒，翠袖倚闌干。霞綃裏處櫻唇微綻，靨鞞紅殷。故宮事往，憑誰問，無恙是朱顏。玉墀爭採玉釵爭插，至正年間。

又

中元夜有感

手寫香臺金字經，惟願結來生。  
蓮花漏轉楊枝露，滴想鑒微誠。  
欲知奉倩神傷極，憑訴與秋擎。  
西風不管一池萍，水幾點荷燈。

又  
詠梅

莫把瓊花比澹妝，誰似白霓裳。  
別樣清幽自然標格，莫近東牆。  
冰肌玉骨天分付，兼付與淒涼。  
可憐遙夜冷烟和月，踈影橫牕。

又

獨倚春寒掩夕扉，清露泣銖衣。  
玉簫吹夢金釵劃。

影悔不同攜 刻殘紅燭曾相待  
舊事總依稀 料應遺恨月中教  
去花底催歸

又

重見星娥碧海查 忍笑却盤鴉  
尋常多少月明風 細今夜偏佳  
休籠彩筆閒書字 街鼓已三過  
烟絲欲裊露光微 泫春在桃花

荷葉杯

簾捲落花如雪烟 月誰在小紅亭  
玉釵敲竹乍聞聲 風影略分明  
化作彩雲飛去 何處不隔枕函

邊一聲將息曉寒天腸斷又今年

又

知己一人誰是已矣贏得誤他生有情終古似無  
情別語悔分明莫道芳時易度朝暮珍重好花  
天爲伊指點再來綠踈雨洗遺鈿

梅梢雪

元夜  
月蝕

星毬映徹一痕微褪梅梢雪紫姑待話經年別竊  
藥心灰慵把菱花揭踏歌纔起清鉦歇扇紈仍  
似秋期潔天公畢竟風流絕教看蛾眉特放些時

缺

木蘭花令

擬古決  
絕詞

人生若只如初見何事秋風悲画扇等閒變却故  
人心却道故心人易變 驪山雨罷清宵半淚雨  
零鈴終不怨何如薄倖錦衣郎比翼連枝當日願

長相思

山一程水一程身向榆關那畔行夜深千帳燈  
風一更雪一更聒碎鄉心夢不成故園無此聲

朝中措

蜀絃秦柱不關情  
盡日掩雲屏  
已惜輕翎退粉更  
嫌弱絮爲萍  
東風多事餘寒吹散  
烘煖微醒看  
盡一簾紅雨爲誰親  
繫花鈴

尋芳草

蕭寺  
記夢

客夜怎生過  
夢相伴綺牕吟  
和薄嗔佯笑道  
若不  
是恁淒涼肯來麼  
來去苦匆匆  
準擬待曉鐘敲  
破乍偎人  
一閃燈花墮  
却對著瑠璃火

遐方怨

歌角枕掩紅窓  
夢到江南伊家  
博山沉水香浣裙

歸晚坐思量輕烟籠淺黛月茫茫

秋千索

溧水亭  
春望

壚邊喚酒雙鬟亞春已到賣花簾下一道香塵碎  
綠蘋看白袷親調馬烟絲宛宛愁縈挂牘幾筆  
晚晴圖画半枕芙蓉壓浪眠教費盡鶯兒話

又

藥闌攜手銷魂侶爭不記看承人處除向東風訴  
此情奈竟日春無語悠揚撲盡風前絮又百五  
韶光難住滿地梨花似去年却多了廉纖雨



又

遊絲斷續東風弱，渾無語半垂簾幙。  
茜袖誰招，曲檻邊弄一縷秋千索。  
惜花人共殘春薄，春欲盡纖腰如削。  
新月纔堪照，獨愁却又照梨花落。

茶瓶兒

楊花糝徑櫻桃落，綠陰下晴波燕掠。  
好景成擔閣，秋千背倚風態宛如昨。  
可惜春來總蕭索，人瘦損紙鷲風惡。  
多少芳箋約，青鸞去也誰與勸孤酌。

好事近

簾外五更風消受曉寒時節剛剩秋衾一半擁透  
簾殘月爭教清淚不成冰好處便輕別擬把傷  
離情緒待曉寒重說

又

何路向家園歷歷殘山剩水都把一春冷淡到麥  
秋天氣料應重發隔年花莫問花前事縱使東  
風依舊怕紅顏不似

又

馬首望青山零落繁華如此再向斷烟衰草認蘚

碑題字 休尋折戟話當年只洒悲秋淚斜日十  
三陵下過新豐獵騎

太常引

自題  
小照

西風乍起峭寒生驚鴈避移營千里暮雲平休回  
首長亭短亭 無窮山色無邊往事一例冷清清  
試倩玉簫聲喚千古英雄夢醒

又

晚來風起撼花鈴人在碧山亭愁裏不堪聽那更  
雜泉聲雨聲 無憑踪跡無聊心緒誰說與多情

夢也不分明又何必催教夢醒

轉應曲

明月明月曾照箇人離別玉壺紅淚相偎還似當年  
夜來來夜來夜肯把清輝重借

山花子

林下荒苔道韞家生憐玉骨委塵沙愁向風前無  
處說數歸鴉半世浮萍隨逝水一宵冷雨葬名  
花魂似柳絲吹欲碎繞天涯

又

昨夜濃香分外宜  
天將妍煖護雙栖  
樺燭影微紅  
玉軟燕釵垂  
幾爲愁多翻自笑  
那逢歡極却含  
啼  
央及蓮花清漏滴  
莫相催

又

風絮飄殘已化萍  
泥蓮剛倩藕絲縈  
珍重別拈香  
一瓣記前生  
人到情多情轉薄  
而今真箇悔多  
情  
又到斷腸回首處  
淚偷零

又

欲話心情夢已闌  
鏡中依約見春山  
方悔從前真

州州等閒看 環佩祇應歸  
月下鈿釵何意寄人  
閒多少滴殘紅蠟淚  
幾時乾

又

小立紅橋柳半垂  
越羅裙颺縷金衣  
採得石榴雙  
葉子欲貽誰  
便是有情當落日  
祇應無伴送斜  
暉  
寄語東風休著力  
不禁吹

菩薩蠻

窓前桃蕊嬌如倦  
東風淚洗臙脂面  
人在小紅樓  
離情唱石州  
夜來雙燕宿  
燈背屏腰綠  
香盡雨

闌珊薄衾寒不寒

又

朔風吹散三更雪  
清魂猶戀桃花月  
夢好莫催醒  
由他好處行  
無端聽畫角  
枕畔紅冰薄  
塞馬一聲嘶  
殘星拂大旗

又

問君何事輕離別  
一年能幾團圓月  
楊柳乍如絲  
故園春盡時  
春歸歸不得  
兩槳松花隔  
舊事逐寒潮  
啼鶻恨未消

又

爲陳其  
年題照

烏絲曲倩紅兒譜蕭然半壁驚秋雨曲罷髻髮偏  
風姿真可憐鬚髯渾似戟時作簪花劇背立訝  
卿卿知卿無那情

又

宿灤  
河

玉繩斜轉疑清曉淒淒月白漁陽道星影漾寒沙  
微茫織浪花金笳鳴故壘喚起人難睡無數紫  
鴛鴦共嫌今夜涼

又



詞意通集卷一  
荒雞再咽天難曉星榆落盡秋將老  
羶幕遶牛羊  
敲冰飲酪漿  
山程兼水宿漏點清鉦續正是夢  
回時擁衾無限思

又

新寒中酒敲窓雨殘香細裊秋情緒繞道莫傷神  
青衫濕一痕  
無聊成獨卧彈指韶光過記得別  
伊時桃花柳萬絲

又

白日驚飈冬已半解鞍正值昏鴉亂冰合大河流

茫茫一片愁  
燒痕空極望  
鼓角高城上  
明日近  
長安客  
心愁未闌

又

蕭蕭幾葉風  
兼雨離人偏識長  
更苦歎枕數秋天  
蟾蜍早下弦  
夜寒驚被薄  
淚與燈花落  
無處不  
傷心輕塵在玉琴

又

迴文

霧牕寒對遙天  
暮暮天遙對寒窓  
霧花落正啼鴉  
鴉啼正落花  
袖羅垂影瘦  
瘦影垂羅袖  
風翦一

絲紅紅絲一翦風

又

催花未歇花奴鼓酒醒已見殘紅舞不忍覆餘觴  
臨風淚數行粉香看又別空賸當時月月也異  
當時淒清照鬢絲

又

惜春春去驚新燠粉融輕汗紅絲撲妝罷只思眠  
江南四月天綠陰簾半揭此景清幽絕行度竹  
林風單衫杏子紅

又

榛荆滿眼山城路  
征鴻不爲愁人住  
何處是長安  
濕雲吹雨寒  
絲絲心欲碎  
應是悲秋淚  
淚向客  
中多歸時又奈何

又

春雲吹散湘簾雨  
絮粘蝴蝶飛  
還住人在玉樓中  
樓高四面風  
柳烟絲一把暝色籠  
鴛瓦休近小  
闌干夕陽無限山

又

曉寒瘦著西南月  
丁丁漏箭餘香咽  
春已十分宜  
東風無是非  
蜀魂羞顧影  
玉照斜紅冷  
誰唱後  
庭花新年憶舊家

又

爲春憔悴留春住  
那禁半霎催歸雨  
深巷賣櫻桃  
雨餘紅更嬌  
黃昏清淚閣  
忍便花飄泊  
消得一  
聲鶯東風三月情

又

隔花纔歇廉纖雨  
一聲彈指渾無語  
梁燕自雙歸

長條脉脉垂 小屏山色遠  
妝薄鉛華淺 獨立  
瑤階透寒金縷鞵

又

黃雲紫塞三千里 女牆西畔啼鳥起  
落日萬山寒 蕭蕭獵馬還  
笳聲聽不得 入夜空城黑  
秋夢不歸家 殘燈落碎花

又

飄蓬只逐驚飈轉 行人過盡烟光遠  
立馬認河流 茂陵風雨秋  
寂寥行殿鎖 梵唄琉璃火  
塞鴈與

宮鴉山深日易斜

又

晶簾一片傷心白  
雲鬢香霧成遙隔  
無語問添衣  
桐陰月已西  
西風鳴絡緯  
不許愁人睡  
只是去年秋  
如何淚欲流

又

寄梁汾  
茗中

知君此際情蕭索  
黃蘆苦竹孤舟泊  
烟白酒旗青  
水村魚市晴  
柁樓今夕夢  
脉脉春寒送  
直過画  
眉橋錢塘江上潮

又 迴文

客中愁損催寒夕夕寒催損愁中客門掩月黃昏  
昏黃月掩門 翠衾孤擁醉醉擁孤衾翠醒莫更  
多情情多更莫醒

又 迴文

研箋銀粉殘煤画画煤殘粉銀箋研清夜一燈明  
明燈一夜清 片花驚宿燕燕宿驚花片親自夢  
歸人人歸夢自親

又



烏絲畫作迴紋紙香煤暗蝕藏頭字筆鴈十三雙  
輸他作一行相看仍似客但道休相憶索性不  
還家落殘紅杏花

又

闌風伏雨催寒食櫻桃一夜花狼藉剛與病相宜  
鎖窓薰繡衣画眉煩女伴央及流鶯喚半餉試  
開奩嬌多直自嫌

醉桃源

斜風細雨正霏霏画簾拖地垂屏山幾曲篆香微

閒庭柳絮飛  
新綠密亂紅稀  
乳鶯殘日啼餘寒  
欲透縷金衣  
落花郎未歸

昭君怨

深禁好春誰惜  
薄暮瑤階竚立  
別院管絃聲不分  
明 又是梨花欲謝  
繡被春寒今夜寂  
寂鏤朱門  
夢承恩

通志堂集卷七

通志堂集卷八

納蘭 性德

容若 原名成德

詞三

琵琶仙 中秋

碧海年年試問取冰輪爲誰圓缺吹到一片秋香  
清輝了如雪愁中看好天良夜知道盡成悲咽隻  
影而今那堪重對舊時明月 花徑裏戲捉迷藏  
曾惹下蕭蕭井梧葉記否輕紈小扇又幾番涼熱  
祇落得填膺百感總茫茫不關離別一任紫玉無

情夜寒吹裂

清平樂

淒淒切切慘澹黃花節夢裏砧聲渾未歇那更亂  
蛩悲咽塵生燕子空樓拋殘絃索牀頭一樣曉  
風殘月而今觸緒添愁

又

上元  
月蝕

瑤華映闕烘散萸墀雪比似尋常清景別第一團  
圓時節影娥忽泛初弦分輝借與宮蓮七寶脩  
成合璧重輪歲中天

又

烟輕雨小望裏青難了一縷斷虹垂樹杪又是亂  
山殘照 憑高目斷征途暮雲千里平蕪日夜河  
流東下錦書應託雙魚

又

孤花片葉斷送清秋節寂寂繡屏香篆滅暗裏朱  
顏消歇 誰憐散髻吹笙天涯芳草關情懊惱隔  
簾幽夢半牀花月縱橫

又

麝烟深漾人擁綠笙斝新恨暗隨新月長不辨眉  
尖心上 六花斜撲疎簾地衣紅錦輕霑記取暖  
香如夢耐他一晌寒巖

又

將愁不去秋色行難住六曲屏山深院宇日日風  
風雨雨 雨晴籬菊初香人言此日重陽回首涼  
雲暮葉黃昏無限思量

又

青陵蝶夢倒挂憐么鳳退粉收香情一種棲傍玉

釵偷共 惛惛鏡閣飛蛾誰傳錦字秋河蓮子依然  
隱霧菱花暗惜橫波

又

風鬟雨鬢偏是來無準倦倚玉蘭看月暈容易語  
低香近 輕風吹徧窓紗心期便隔天涯從此傷  
春傷別黃昏只對梨花

又

彈琴峽  
題辭

泠泠徹夜誰是知音者如夢前朝何處也一曲邊  
愁難寫 極天關塞雲中人隨落雁西風喚取紅

襟翠袖莫教淚灑英雄

又憶梁汾

纔聽夜雨便覺秋如許繞砌蛩螿人不語有夢轉  
愁無據亂山千疊橫江憶君游倦何方知否小  
窓紅燭照人此夜淒涼

又

塞鴻去矣錦字何時寄記得燈前伴忍淚却問明  
朝行未別來幾度如珪飄零落葉成堆一種曉  
寒殘夢淒涼畢竟因誰



一叢花

詠並  
帶蓮

闌珊玉珮罷霓裳相對綰紅妝藕絲風送凌波去  
又低頭軟語商量一種情深十分心苦脈脈背斜  
陽色香空盡轉生香明月小銀塘桃根桃葉終  
相守伴殷勤雙宿鴛鴦菰米漂殘沈雲乍黑同夢  
寄瀟湘

菊花新

用韻送張見  
陽令江華

愁絕行人天易暮行向鷓鴣聲裏住渺渺洞庭波  
木葉下楚天何處折殘楊柳應無數趁離亭笛

聲吹度有幾箇征鴻相伴也送君南去

澹黃柳

詠柳

三眠未歇乍到秋時節一樹斜陽蟬更咽曾綰灞  
陵離別絮已爲萍風卷葉空淒切長條莫輕折  
蘇小恨倩他說儘飄零游冶章臺客紅版橋空濺  
裙人去依舊曉風殘月

滿宮花

吟天涯芳訊絕莫是故情全歇朦朧寒月影微黃  
情更薄于寒月麝烟銷蘭燼滅多少怨眉愁睫

芙蓉蓮子待分明  
莫向暗中磨折

洞仙歌

詠黃  
葵

鉛華不御看道家  
妝就問取旁人入時否  
爲孤情澹韻判不宜  
春矜標格開向晚秋時候  
無端輕薄雨滴損檀心  
小疊宮羅鎮長皺  
何必訴淒清爲愛秋光  
被幾日西風吹瘦  
便零落蜂黃也休嫌  
且對倚斜陽勝偎紅袖

唐多令

雨夜

絲雨織紅茵  
苔階壓繡紋  
是年年腸斷黃昏到眼

芳菲都惹恨那更說塞垣春  
蕭颯不堪聞殘妝  
擁夜分爲梨花深掩重門  
夢向金微山下去纔識  
路又移軍

秋水

聽雨

誰道破愁須仗酒酒醒後心翻醉  
正香銷翠被隔  
簾驚聽那又是點點絲絲和淚憶  
翦燭幽窓小憩  
嬌夢垂成頻喚覺一睽秋水  
依舊亂蛩聲裏短  
藥明滅怎教人睡想幾年蹤迹  
過頭風浪只消受  
一段橫波花底向擁髻燈前提起  
甚日還來同領

略夜雨空階滋味

虞美人

峰高獨石當頭起影落雙溪水馬嘶人語各西東  
行到斷崖無路小橋通朔鴻過盡歸期杳人向  
征鞍老又將絲淚濕斜陽回首十三陵樹暮雲黃

又

黃昏又聽城頭角病起心情惡藥爐初沸短檠青  
無那殘香半縷惱多情多情自古原多病清鏡  
憐清影一聲彈指淚如絲及東風休遣玉人知

又

憑君料理花間課，莫負當初我眼看。  
雞犬上天梯，黃九自招秦七共泥犁。  
瘦狂那似癡肥好，判任癡肥笑笑他。  
多病與長貧，不及諸公袞袞向風塵。

又

綠陰簾外梧桐影，玉虎牽金井。  
怕聽啼鴂出簾遲，恰到年年今日兩相思。  
淒涼滿地紅心草，此恨誰知道。  
待將幽憶寄新詞，分付芭蕉風定月斜時。

又

風滅爐烟殘，冷相伴。惟孤影，判教狼藉醉清尊。  
爲問世間醒眼，是何人。難逢易散花間酒，飲罷  
空搔首。閒愁總付醉來眠，只恐醒時依舊到尊前。

又

春情只到梨花薄，片片催零落。夕陽何事近黃昏，  
不道人間猶有未招魂。銀牋別夢當時句，密結  
同心苣。爲伊判作夢中人，長向畫圖清夜喚真真。

又

曲闌深處重相見，勻淚偎人顫。淒涼別後兩應同。

最是不勝清怨月明中  
半生已分孤眠過山枕  
檀痕沈憶來何事最銷魂  
第一折枝花樣畫羅裙

又

彩雲易向秋空散  
燕子憐長歎  
幾番離合總無因  
贏得一回僂憊一回親  
歸鴻舊約霜前至  
可寄香牋字  
不如前事不思量  
且枕紅蕤歌側看斜陽

又

銀牀浙瀝青梧老  
屨粉秋蛩掃采香  
行處感連錢  
拾得翠翹何恨不能言  
回廊一寸相思地  
落月



成孤倚背燈和月就花陰已是十年蹤迹十年心

瀟湘雨

送西溟  
歸慈谿

長安一夜雨便添了幾分秋色柰此際蕭條無端  
又聽渭城風笛咫尺層城留不住久相忘到此偏  
相憶依依白露丹楓漸行漸遠天涯南北 悽寂  
黔婁當日事總名士如何消得只阜帽寒驢西風  
殘照倦游蹤迹廿載江南猶落拓歎一人知己終  
難覓君須愛酒能詩鑑湖無恙一蓑一笠

雨中花

送徐藝初  
歸崑山

天外孤帆雲外樹看又是春隨人去水驛燈昏關  
城月落不算淒涼處計程應惜天涯暮打疊起  
傷心無數中坐波濤眼前冷暖多少人難語

臨江僊

絲雨如塵雲著水嬌香碎拾吳宮百花冷暖避東  
風酷憐嬌易散燕子學偎紅人說病宜隨月減  
慊慊却與春同可能留蝶抱花叢不成雙夢影翻  
笑杏梁空

又

長記碧紗窓外語秋風吹送歸鴉片帆從此寄天涯  
一燈新睡覺思夢月初斜便是欲歸歸未得  
不如燕子還家春雲春水帶輕霞畫船人似月細  
雨落楊花

又塞上得家報云秋  
海棠開矣賦此

六曲闌干三夜雨倩誰護取嬌慵可憐寂寞粉牆  
東已分裙衩綠猶裹淚綃紅曾記鬢邊斜落下  
半牀涼月惺忪舊歡如在夢魂中自然腸欲斷何  
必更秋風

又

謝餞  
櫻桃

綠葉成陰春盡也守宮偏護星星留將顏色慰多情  
分明千點淚貯作玉壺冰獨臥文園方病渴  
強拈紅豆酬卿感卿珍重報流鶯惜花須自愛休  
只爲花疼

又

盧龍  
大樹

雨打風吹都似此將軍一去誰憐畫圖曾見綠陰  
圓舊時遺鏃地今日種瓜田繫馬南枝猶在否  
蕭蕭欲下長川九秋黃葉五更烟祇應搖落盡不

必問當年

又  
寒柳

飛絮飛花何處是層冰積雪摧殘疎疎一樹五更  
寒愛他明月好憔悴也相關最是繁絲搖落後  
轉教人憶春山前裙夢斷續應難西風多少恨吹  
不散眉彎

又

夜來帶得些兒雪凍雲一樹垂垂東風回首不勝  
悲葉乾絲未盡未死只顰眉可憶紅泥亭子外

纖腰舞困因誰如今寂寞待人歸明年依舊綠知  
否繫斑駁

又

寄嚴  
孫友

別後閒情何所寄初鶯早雁相思如今憔悴異當  
時飄零心事殘月落花知生小不知江上路分  
明却到梁谿匆匆剛欲話分攜香消夢冷窓白一  
聲雞

又

永平  
道中

獨客單衾誰念我曉來涼雨颼颼棧書欲寄又還

休箇儂憔悴禁得更添愁 曾記年年三月病而  
今病向深秋盧龍風景白人頭藥爐烟裏支枕聽  
河流

又

點滴芭蕉心欲碎聲聲催憶當初欲眠還展舊時  
書鴛鴦小字猶記手生疎 倦眼乍低絳帙亂重  
看一半模糊幽窓冷雨一燈孤料應情盡還道有  
情無

烏雲鬆令

枕函香花徑漏依約相逢絮語黃昏後時節薄寒  
人病酒剗地梨花徹夜東風瘦掩銀屏垂翠袖  
何處吹簫脈脈情微逗腸斷月明紅苴蔻月似當  
時人似當時否

又

詠浴

鬢雲鬆紅玉瑩早月多情送過梨花影半餉斜釵  
慵未整暈入輕潮剛愛微風醒露華清人語靜  
怕被郎窺移却青鸞鏡羅襪凌波波不定小扇單  
衣可耐星前冷



於中好

獨背斜陽上小樓誰家玉笛韻偏幽一行白雁遙  
天暮幾點黃花滿地秋驚節序歎沈浮穠華如  
夢水東流人間所事堪惆悵莫向橫塘問舊遊

又

雁帖寒雲次第飛向南猶自怨歸遲誰能瘦馬關  
山道又到西風撲髻時人杳杳思依依更無芳  
樹有烏啼憑將埽黛窓前月持向今宵照別離

又

別緒如絲睡不成那堪孤枕夢邊城因聽紫塞三更雨却憶紅樓半夜燈書鄭重恨分明天將愁味釀多情起來呵手封題處偏到鴛鴦兩字冰

又

誰道陰山行路難風毛雨血萬人謹松梢露點露鷹細蘆葉溪深沒馬鞍依樹歇映林看黃羊高宴簇金盤蕭蕭一夕霜風緊却擁貂裘怨早寒

又

小構園林寂不譁疎籬曲徑做山家晝長吟罷風

流子忽聽楸枰響碧紗  
添竹石伴烟霞擬憑尊  
酒慰年華休嗟髀裏今生肉  
努力春來自種花

又

十月初四夜風雨其  
明日是亡婦生辰

塵滿疎簾素帶飄真成暗度  
可憐宵幾回偷拭青  
衫淚忽傍犀奩見翠翹  
惟有恨轉無聊五更依  
舊落花朝衰楊葉盡絲難盡  
冷雨淒風打畫橋

又

冷露無聲夜欲闌棲鴉不定  
朔風寒生憎畫鼓樓  
頭急不放征人夢裏還  
秋澹澹月彎彎無人起

向月中看明朝匹馬相思處如隔千山與萬山

又

送梁汾南還  
爲題小影

握手西風淚不乾年來多在別離間遙知獨聽燈  
前雨轉憶同看雪後山憑寄語勸加餐桂花時  
節約重還分明小像沈香縷一片傷心欲畫難

南鄉子

搗衣

鴛瓦已新霜欲寄寒衣轉自傷見說征夫容易瘦  
端相夢裏回時仔細量支枕怯空房且拭清礎  
就月光已是深秋兼獨夜淒涼月到西南更斷腸

又  
爲亡婦  
題照

淚咽却無聲，祇向從前悔薄情。  
憑仗丹青重省識，盈盈一片傷心畫不成。  
別語忒分明，午夜鸚鵡  
夢早醒。卿自早醒儂自夢，更更泣盡風檐夜雨鈴。

又

飛絮晚悠颺，斜日波紋映畫梁。  
刺繡女兒樓上立，柔腸愛看晴絲百尺長。  
風定却聞香吹落，殘紅  
在繡牀。休墮玉釵驚比翼，雙雙共啜蘋花綠滿塘。

又  
柳溝  
曉發

燈影伴鳴梭織女依然怨隔河曙色遠連山色起  
青螺回首微茫憶翠蛾 淒切客中過料抵秋閨  
一半多一世疎狂應爲著橫波作箇鴛鴦消得麼

又

何處淬吳鉤一片城荒枕碧流曾是當年龍戰地  
颼颼塞草霜風滿地秋 霸業等閒休躍馬橫戈  
總白頭莫把韶華輕換了封侯多少英雄只廢丘

又

烟暖雨初收落盡繁花小院幽摘得一雙紅豆子

低頭說著分攜淚暗流  
人去似春休  
卮酒曾將  
酌石尤別自有人  
桃葉渡扁舟  
一種烟波各自愁

蹋莎行

月華如水波紋似練  
幾簇澹烟衰柳塞鴻  
一夜盡南飛  
誰與問倚樓人瘦  
韻拈風絮錄成金石  
不是舞裙歌袖  
從前負盡埽眉才  
又擔閣鏡囊重繡

又

春水鴨頭春衫鷓鴣  
背烟絲無力風斜倚  
百花時節  
好逢迎可憐人  
掩屏山睡  
密語移燈閒情枕臂

從教醞釀孤眠味春鴻不解諱相思映窓書破人  
人字

又

倚柳題牋當花側帽賞心應比驅馳好錯教雙鬢  
受東風看吹綠影成絲早金殿寒鴉玉階春草  
就中冷暖和誰道小樓明月鎮長閒人生何事縈  
塵老

翦湘雲

送友

險韻慵拈新聲醉倚儘歷徧情場懊惱曾記不道



當時腸斷事還較而今得意向西風約略數年華  
舊心情灰矣 正是冷雨秋槐鬢絲憔悴又領略  
愁中送客滋味密約重逢知甚日看取青衫和淚  
夢天涯繞徧儘由人只尊前迢遞

鵲橋僊

七夕

乞巧樓空影娥池冷佳節祇供愁歎丁寧休曝舊  
羅衣憶素手爲子縫綻 蓮粉飄紅菱絲翳碧仰  
見明星空爛親持鈿合夢中來信天上人間非幻

御帶花

重九夜

晚秋却勝春天好情在冷香深處朱樓六扇小屏  
山寂莫幾分塵土虬尾烟銷人夢覺碎蟲零杵便  
強說歡娛總是無慘心緒轉憶當年消受盡皓  
腕紅萸嫣然一顧如今何事向禪榻茶烟怕歌愁  
舞玉粟寒生且領略月明清露歎此際淒涼何必  
更滿城風雨

疎影

芭蕉

湘簾卷處甚離披翠影繞檐遮住小立吹裾常伴  
春慵掩映繡牀金縷芳心一束渾難展清淚裏隔

年愁聚更夜深細聽空階雨滴夢回無據 正是  
秋來寂莫偏聲聲點點助人離緒纈被初寒宿酒  
全醒攪碎亂蛩雙杵西風落盡庭梧葉還賸得綠  
陰如許想玉人和露折來曾寫斷腸句

添字采桑子

閒愁似與斜陽約紅點蒼苔蛺蝶飛回又是梧桐  
新綠影上階來 天涯望處音塵斷花謝花開懊  
惱離懷空壓鈿筐金縷繡合歡鞦

望江南

宿雙林禪院有感

挑燈坐坐久憶年時薄霧籠花嬌欲泣夜深微月  
下揚枝催道太眠遲 憔悴去此恨有誰知天上  
人間俱悵望經聲佛火兩淒迷未夢已先疑

木蘭花慢

立秋夜雨送  
梁汾南行

盼銀河迢遞驚入夜轉清商乍西園蝴蝶輕翻麝  
粉暗惹蠶黃炎涼等閒瞥眼甚絲絲點點攪柔腸  
應是登臨送客別離滋味重嘗 疑將水墨畫疏  
窓孤影澹瀟湘倩一葉高梧半條殘燭做盡商量  
荷裳被風暗翦問今宵誰與蓋鴛鴦從此羈愁萬

疊夢回分付啼螿

通志堂集卷八